

Vagalatia

¹⁻² une ne nsung'ua Paulo. une nanilinsung'ua kuhuma kuvaanhu nambe kukilila kuvaanhu, neke kukilila kwa Yesu kilisite nu Nguluve Nhaata juno alyansyuluile kuhuma kuvafue. une palikimo na vanyalukolo tukusilembela itembile sooni sa Vagalatia. ³ uvumosi nu lutengano kuhuma kwa Nguluve Nhaata ghwitu nu Mutwa Yesu Kilisite fivisaghe numue. ⁴ jino akihumisie vwimila isambi situ neke kuuti atupoke mu fighono ifi fya vuhosi, kuhumilanila nu lughano lwa Nguluve ghwitu nu Nhaata. ⁵ kwa mwene vuve vwimike vuno navuli kusila na kusila ⁶ nidegha kuuti musyetukila ng'aning'ani mu livangili ilingi, nidegha kuuti musyetukile kutali kuhuma kwa juno alyavakemhelile ku vumosi vwa Kilisite. ⁷ kusila livangili ilingi, neke kwevale avaanhu vamonga vano vikuvasababikisia imhumhuko na kunoghua kusyetulania ilivangili lwa Kilisite. ⁸ neke nambe ndeve twesue au uMhola kuhuma kukyanya apulisia kulumue ilivangili ilingi lino tukapulisie kulumue na aghunuaghe. ⁹ ndavule ino tukajovile muvutengulilo, lino nijova kange, “ndeve kuli nu muunhu ilikuvapulisia ilivangili ilingi lino namukupile na aghunuaghe,” ¹⁰ pe lino nilonda kuhakikisia ku vaanhu au uNguluve. nilonda kukuvahovosia avaanhu? ndeve nighendelela kughelasia kuku-vahovosia avaanhu, une nanili nsung'ua ghwa

Kilisite. ¹¹ vanyalukolo ninoghua umue mukagule kuuti ilivangili lini nikapulisie nalihumila kuvaanhu. ¹² nanikwupile kuhuma kwa muunhu, nambe nanikavulanisifue, looli lulyale lwe, vwa Yesu Kilisite kulyune. ¹³ mukapulike uvwumi vango uvwa kunsana ku nyifunyo isa kiYahudi, silyale sikumhumhusia ku vukali mu tembile ja Nguluve kukila na kukum'buda. ¹⁴ nilyaghendelile mu tembile ja kiYahudi kukila avanyalukolo vango vinga avayahudi. nilyalye nu lughimbo kyongo mu vutavike la vababa vango. ¹⁵ neke uNguluve lukamunoghile kuku-navua une kuhuma mulileme lwa mama gh-wango. akang'emelile une kukilila uvumosi vwake. ¹⁶ kukum'bonesia unswambe n'kate n'jango, neke kuuti nimpulisie u mwene ku vapanji. nanikalondile kuvungua na vaanhu. ¹⁷ kange nanikatoghile ku Yelusalemu ku vala vano valyale vasung'ua ye nikyale une. pe pano nikaluta ku vualabuni na pambele kugomoka ku Damesiki. ¹⁸ amaka ghatatu pambele nikatogha kuluta kuYelusalemu kukumughendela uKefa, nikikalile nagho iighono kijigho ni fihano. ¹⁹ neke nanikamwaghile unsung'ua ujunge neke ju Yakobo unyalukolo ghwa Mutwa. ²⁰ loola! pavulongolo pa Ngulluve nanisyanga ku kila kino nilemba kulumue. ²¹ pe pano nikaluta ku fighavo fya Shamu na Kulikia. ²² nanika kagulike ku maaso gha tembile ja vayahudi vano valyale mwa Kilisite, ²³ neke vakale vipulika lwene," umwene junu akale ikutupumhusia lino ipulisia ulwitiko luno akale ikulunangania." ²⁴ valyale vikumughinia uNguluve vwimila

jango.

uvwandulilo vwa 2

¹ kukila amaka kijigho na ghane une, uBalin-aba palikimo nu Tiito tukaluta kange ku Yelusalemu. ² nikalutile ulwakuva uNguluve akivonisie kulyune kuuti nikanoghile kuluta. nikavikile pa maaso ghawe ilivangili lino nikapulisie ku vapanji. { neke nikajovile kuluiso ku vano vakajovilue kuuva vimilisi}. nikavombile ndiki neke kuuti nanikale nikimbila nambe nikakimbile vuvule. ³ neke nambe uTiito juno alyale palikimo nune, juno alyale muYunani vakamulasimisie kukekua. ⁴ ili likahumile ulwakuva avanyalukolo vavudesi vakisile kuluiso kuposelesia uvuhulu vuno tulinavwo mwa Kilisite Yesu. vakanoghilue kukutuvomba usue tuve vasung'ua va ndaghilo. ⁵ natukajihumisie kukuvitika nambe ilisala limo neke kuuti ilivangili lya kyang'haani lisighale kisila ndavule lilivuo ulyumue. ⁶ neke vala vano vajovilue kuva valyale vimilisi navakahangile kimonga kulyune kino vakale vikukivomba nakikale nu luuvumbulilo kulyune. unguvuve naikwitika ulughano luno lukililile lwa vaanhu. ⁷ pe pano vakanyaghile kuuti nitikilue kupulisia ilivangili ku vala vano navakekilue. lu lyale ndavule uPeteli apulisie ilivangili ku vano vakekilue. ⁸ ulwakuva uNguluve akavombile imbombo n'kate ja Peteli vwimila uvusung'ue ku vala vano vakekilue, kange akalyavombile imbombo n'kate jango ku vapanji. ⁹ unsiki ghuno uYakobo, uKefa

nu Yohani, valyakagulike kuva valyajengile itembile, vakavumanyile uvumosi vuno nikapelilue, vakatwupile mulukong'ano une nu Barnaba, vakavombile ndiki neke kuuti, tulute kuvapanji, kange neke tuwesie kuluta kuvala vano vakekilue. ¹⁰ kange vakatulondile usue kukuvakumbua avakotofu. nune kange nikanoghilue kuvomba ndikio. ¹¹ unsiki ghuno uKefa akisile ku Antikia, nikankanile pavwelu ulwakuva akahokile. ¹² ye vakyale kukwisa avaanhu vamonga kuhuma kwa Yakobo, uKefa akale ilia palikimo navapanji. nekea avaanhu ava ye vikwisa akabuhila na kuvuka kuhuma ku vapanji akale ikwoghopa avaanhu vanovilonda kukekua. ¹³ vule vule navaYahudi vamonga vakalungine nu kefa mu vuhomeleng'ani uvu. amahumile ghake ghakale kuuti nambe uBarnaba akatolilue nu vuhomeleng'ani vwaave. ¹⁴ neke ye nilolile kuuti navakale vikulilutila ilivangili ilya kyang'haani, nikam'bula uKefa pa maaso ghawe vooni," ndeve umue mulivaYahudi neke mukukala mu vutavike uvwa vapanji nakukuvuleka uvwa vayahudi, kiki mukuvalasimisia avapanji kukukala ndavule avaYahudi?" ¹⁵ usue twevano tulivayahudi vakuholua, natulivapanji avanya sambu." ¹⁶ kagula kuuti nakwale juno ivalilua ikyang'haani mu maghendele gha ndaghilo. looli vivalilua ikyang'haani ku lwitiko nkate ja Kilisite Yesu neke kuuti tualilua ikyang'haani ku lwitiko n'kate ja Kilisite sio kuuti kumaghendele gha ndaghilo. mu maghendele gha ndaghilo kusila m'bili ghuno ghulivalilua

ikyang'haani. ¹⁷ neke pano tukumulonda uNguluve kwa kutuvalila ikyang'haani n'kate ja Kilisite, tukujagha najusue tuli ni sambu, pe uKilisite akavombilue kuuva nyasambu? na ndikio! ¹⁸ ulwakuva ndeve nivika uluhuvilo lwango kuvika indaghilo, uluhuvilo luno nikavusisie, nikujivonesia june kuva nilin'denya ndaghilo. ¹⁹ kukilila indaghilo nikawile mu ndaghilo, lino ninoghile kukukala vwimila uNguluve. ²⁰ nipumwike palikimo nu Kilisite na nene kange nejuno nikukala, looli uKilisite ikukala n'kate jango. uvwumi vuno nikukala mu m'bili nikukala ku lwitiko n'kate ja mwa Nguluve juno akanighanile na kukujihumia vwimila jango. ²¹ nanikuvukana uvumosi vwa Nguluve ulwakuva ndeve ikyang'haani pwejikale kukilila indaghilo, pe uKilisite nde akaile vuvule.

uvwandulilo vwa 3

¹ vagalatia vajaasu, lwe liso liki ilihosi lino livananginie? pe uKilisite nakavonike hwene mpumuke pa maaso ghinu? ² une ninoghua kukagula ili kuhuma ku lyumue. pe mukamwupile uMhepo kumaghendele gha ndaghilo au kwa kwitikila sila sinomukupile? ³ pe umue mulivajaasu ene ndiki? pe mukatengile nu Mhepo neka mumale nu m'bili? ⁴ pe mukapumwike mu nyinga vuvule, ndeve lweli sikale sa vuvule? ⁵ pe umwene juno amwumisie uMhepo kulumue nakuvomba isinya ngufu kulumue ivomba ku sa ndaghilo au kupulika palikimo nu lwitiko? ⁶ UAbulhamu “alyale mwitiki kwa Nguluve akavalilue kuuva nyakyang'haani” ⁷ mu lula lula

mukagule kuuti, vala vano vikwitika ve vaanha va Abulahamu. ⁸ ililembe likavonwile kuuti uNguluve ale ikuvavalila ikyang'haani avapanji kusila ja lwitiko. ilivangili likadalikilue kwa Abulahamu taasi: “kukilila uve iisi sooni sikaun-yilue”. ⁹ neka pambele vala avanya lwitiko viise vafunyue palikimo nu Abulahamu, juno akale nu lwitiko. ¹⁰ vala vano vihuvila amaghendele gha ndaghilo vali mu lughuno. ulwakuva jilembilue, aghunilue umuunhu ghweni juno naikolana ni sooni sino silembilue mu kilembe kya ndaghilo, kukusivomba sooni. ¹¹ lino vwelu kuuti uNguluve naikum'balila ikyang'haani nambe jumo mu ndaghilo kwa kuva unya kyang'haani ikukala ku lwitiko” ¹² indaghilo najihumilanila nu lwitiko, neke pe pano “juno ivomba isi mu ndaghilo ikukala mu ndaghilo. ¹³ uKilisite alyatupokile usue kuhuma ku lughuno lwa ndaghilo un'siki ghuno akavombikue kuuva lughuno vwimila jitu, ulwakuva jilembilue,” aghunilue umuunhu ghweni juno akovikue kukyanya ja mpiki.” ¹⁴ uvufumbue vulyale kuuti, ulufunyo luno lulyale kwa Abulahamu lwale lukwisa kuvapanji mwa Kilisite yeesu, neke kuuti twupile uluingo lwa Mhepo kukilila u lwitiko. ¹⁵ vanyalukolo nijova mu lwa m'bili nambe pano ulwiting'ano lwa ki muunhu luvikilue kikangafu, nakwale juno iwesia kubenapula nambe kukwongeesia. ¹⁶ lino ulufingo lukajovilue kwa Abulahamu na kukisina kyake. najijova kuuti, “kufisina” ku-sona vinga looli jumo mwene, “ku kisina kyako” juno ghwe Kilisite. ¹⁷ lino niti ndiki, indaghilo jino jikisie amaka 430 pambele, najivusia ulupul-

ing'ahano lwa kunsana luno lukavikilue nu Ngu-luve. ¹⁸ kwa kuva uvwimilisi vwale vukwisa ku sila ja ndaghilo, navwale vukwisa kange ku sila ja lufingo. neke uNguluve akavuhumisie vuvule kwa Abulahamu ku sila ja lufingo. ¹⁹ kiki lino indaghilo jikahumisivue? jikongelesivue kuhumila mu vuhosi, kuhanga umuholua ghwa Abulahamu ise ku vala vano akafingilue, indaghilo jikavikilue ku kulila avanyMhola ku luvoko lwa juno isambania. ²⁰ lino juno isambania ifumbua kukila umuunhu jumo, looli uNguluve ghwe jumo mwene. ²¹ pe lino indaghilo najijova isa mu lufingo lwa Nguluve? na kwekuuti! ulwakuva nave indaghilo jino jikamumisivue jilyale ni ngufu isa kuleta uvwumi, ikyang'ani jale jipatikana ku ndaghilo. ²² neke peepano ililembe lidindiile sooni mu muvuhosi. uNguluve alyavombile ndiki neke kuuti ulufungo lwake ulwa kutupoka usue ku lwitiko mwa Kilisite Yesu luwesie kupatikana ku vala vano vikumwitika. ²³ neke ye lukyale kumema ulwitiko lwa Kilisite, tulyadindilue na kuva pasi pa ndaghilo kuhanga lwise ulusyetulilo lwa lwitiko. ²⁴ pe lino indaghilo jilyale ghwe mulongosi ghwitu kuhanga uKilisite pano akisilse, neke kuuti, tualilue ikyang'ani ku lwitiko. ²⁵ lino ulwakuva ulwitiko lwisile natuli mwa mulolelesi kange. ²⁶ ulwakuva umue mweni muli vaanha va Nguluve kukilila ulwitiko mwa Kilisite Yesu. ²⁷ mwevoni mwevano mukofughue mwa Kilisite munfwalile u Kilisite, ²⁸ namkwale umuYahudi nambe umuYunani, umbombi nambe juno na m'bombi, umughosi nambe un'dala, ulwakuva

mweni mulivamo mwa Kilisite Yesu. ²⁹ nave muli va Kilisite pe nuvuholuo lwa Abulamamu, vapelua kuvutavike vwa lufingo.

uvwandulilo vwa 4

¹ nijova kuuti ulwakuva umwimilisi ghwe mwana, aling'ine nu m'bombi, nambe ulwakuva ghwe nyakyuma kyoni. ² pe lino alipasi pavalolelesi kuhanga unsiki ghuno ghuvikilule nu viise ghwake. ³ pe pano najusue pano tulyale vaanha, tukakolelivue mu vuvombi vwa vutavike vwa kwanda vwa iisi. ⁴ neke unsiki ghuno ghunoghile yeghufikile, uNguluve akansung'ha unswambe, umuholua ghwa n'dala, umuholua mu ndaghilo. ⁵ akavombile ndikio neke kukuvapoka vano valyale mundaghilo, neke kuti twupile mu sa kuuva hwene vaanha. ⁶ ulwakuva umue muli vaanha, uNguluve akan'sung'ile uMhepo ghwa nswambe n'kate ja numbula siitu, uMhepo juno ikemhelua "Abba, Nhaata". ⁷ mu ulu usue natulivavombi kange looli vaanha. ndeve ve vaanha pe tulivimilisi kukilila uNguluve. ⁸ nambe unsiki ghuno namukan'kagwile uNguluve, mulywale vavombi ku vala vano muvwandilo naihwani fya Nguluve. ⁹ neke lino ulwakuva mukun'kagula uNguluve, nambe kuuti mukagulika kwa Nguluve kiki mugomoka kange muvutavike uvuvotevute uvwa kwanda kange vusila lutalama? pe munoghelua kuva vavombi kanhe? ¹⁰ mukukikola ku vulolesi ikoghono ikitavike kukong'ana kwa mwesi, na maka. nikwoghopa vwimila jinu. ¹¹ nikwoghopa

kuuti mu lumonga mukipumwisie vuvule.
¹² nikuvasuuma vanyalukolo muvisaghe ndavule
nilivuo, ¹³ ulwakuva kange nili ndavule nilivuo.
namukanihokie. pe mukagula kuuti, looli
vulyale vutamy vwa m'bili kuuti nulyadalikile
ilivangili kulumue ulwa kwanda. ¹⁴ nambe
uvwumi vwango vwa m'bili vulyale mu g'helo,
namukanibenapwile nambe kukunikana.
pepano mukanyipile hwene Mhepo ghwa
Nguluve, ilyale hwene ghwe Kilisite jujoo. ¹⁵ pe
lino, muhovokela kiki? ulwakuva nikusagha
kulumue kuuti, ndejiwesekana muvisie
amaaso ghinu na kukumhela une. ¹⁶ neke lino
pe nili mulugu ghwinu ulwakuva nikuvavula
uvulweli? ¹⁷ vikuvalonda kwa kunoghua, kange
navagholou. vilonda kukuvavika lubale nune,
neke muvalutile. ¹⁸ ke kanono jaatu kuva
nu lunoghelua ku vufumbue vuno vunono,
nakwekuuti lwene pano milipalikimo nune looli
ifighono fyoni. ¹⁹ vanango vadebe nivavua
uvutungu vwimila jiinu kange kuhanga uKilisite
avumbike n'kate jiinu. ²⁰ lino nale ninoghelua
kuva palikimo numue na kusyetulania isavuti
jango, ulwakuva nanili nu lutengano numue.
²¹ mumbule umue mwevano munoghua kuva
pasi pa ndaghilo, namupulika kange indaghilo
pano jiti? ²² ulwakuva jilembilue kuuti
uAbulahamu alyale na vaanha vaviliavadimi,
jumo kwa n'dala um'bombi nu junge kwa
n'dala huru, ²³ nambe nahele, ughwa akaholilue
m'bombi akaholilue mu lwa m'bili lwene. loli
jula ughwa n'dala huru akaholilue ku lufingo.
²⁴ isi ndeponu sijovua kwakutulila ikuhwani,

ulwakuva avadla ava vilingana na mapuling'ano ghavili. ghamo kuhula ku kidunda Sinai. kihola avaanha vano avombi. uju ghwe Hajili. ²⁵ lino uHajili kwe kidunda Sinai kino kili ku Arabuni. kiling'anisivua ni Yelusalemu ija lino, ulwakuva ve vavombi palikimo na vaanha vaake. ²⁶ pe iYelusalemu jino jili nkyanya jili huru, iji je mama jitu. ²⁷ ulwakuva jilembilue, "hovoka, uve ghwe n'dala juno naghuhola. tosia isavuti kukyanya na kuhovoka, uve ghwe juno numanyile kuhola. ulwakuva vinga ve vaanha va juno naihola, kukila vala vala vajuno ali numughosi. ²⁸ lino vanyalukolo ndavule u Isaka, umue mulivaanha va lufingo, ²⁹ mu n'siki ghula ghuno umuunhu ghweni juno akaholilue ku vutavike vwa m'bili akampumwisie jula juno akaholilue ku vutavike vwa Mhepo. na lino vwe vulevule. ³⁰ amalembe ghati ndani? m'busie un'dala um'bombi palikimo nu n'swambe. ulwakuva un'swambe ghwa n'dala um'bombi naililololela palikimo nu mwanha ghwa n'dala huru.' ³¹ pe lino vanyalukolo usue natuli vaanha va n'dala um'bombi, looli va n'dala huru.

uvwandulilo vwa 5

¹ ulwakuva uKilisite alyatupelile uvwelu neke tuuve nu vwelu. lini mwime mu lukangafu kange namungakolwaghe kuva vavombi. ² lola une ne Paulo, nikuvavula kuuti ndeve mulikekua, uKilisite nailikuvwagha uvufumbue ku sila jojoni. ³ kange, nikumwagha umughosi ghweni juno akekilue kuuti anoghiile kuvomba ku ndaghilo joni. ⁴ vala vooni vano vivalilua

ikyang'haani mu ndaghilo, muvikiwe kutali nu Kilisite, mughwile kutali nu vumosi. ⁵ lwakuva ku sila ja Mhepo ku lwitiko tughula ulukan-gasio lwa kyang'haani. ⁶ kwa Kilisite Yesu kukekua nambe kisila kukekua kusila luvum-bulilo lwolwoni lwe lwitiko lwene luno luvomba imbombo kukilila ulughano luno luleta uluvum-bulilo. ⁷ mukale mukimbila vunono, veeni juno akavasighile kuleka kukujitikila ilweli? ⁸ uvusyangi vya kuvomba ndikio navuhuma kwa mwene juno alyavakemhelile umue. ⁹ ikilule kidebe kinangania i nonge jooni. ¹⁰ nili nu luhuvilo numue mwa Mutwa kuuti namusagha ku sila ijinge jojoni, nu mwene juno ikuvasyanga ilihighua mwene. ¹¹ vanyalukolo ndeve nighen-delea kupulisia itohala, kiki nifipumhuka? mu ulio kila kino kye kisighi kya kikovekano kilinangisivua. ¹² lwe lunoghelua lwango kuuva vala vano vikuvalongosia fivi fiku-jisyaanga vavuo. ¹³ uNguluve avakemhelile umue vanyalukolo ku vwelu. neke namungatumilaghe uvweru vwinu hwene kyuma kya m'bili. pe pano ku lughano mutanganaghe jumue kwa jumue. ¹⁴ ulwakuva indaghilo joni jikamilike ku ndaghilo jimo; jope je “unoghile kukumughana juno ulipipi naghwo ndavule juve. ¹⁵ neke ndeve mubudala na kulisana, mujilolelelaghe kuuti namungajinanganiaghe jumue kwa ju-mue. ¹⁶ niti, mughendaghe mwa Mhepo, namulivomba isa mubili. ¹⁷ ulwakuva um'bili ghuli ni noghelua ing'ome kukila inumbula, ni numbula jili ni noghelua in'gome kukila um'bili. isi ssoni sipingana, amahumile ghake

kwe kuuti namuvomba ifinu fino munoghelua kuvomba. ¹⁸ neke ndeve uMhepo ikuvalongosia umue, namuli mundaghilo. ¹⁹ lino amaghendee gha mbili ghivoneka. ghope uvuvwafu, uvulamafu, ²⁰ ulufunyo lwa kihwanikisio, uvuhavi, uvulugu, ilibaatu, ni mbedo, kuva ni lyojo, kusindana, ing'aning'ano, ²¹ kiltule, vuhasi, vulia kyongo, ni singi sino sihwanine nisio. nikuvavunga umue ndavele nilyavavungule mu vutengulilo, kuuti voni vanovivomba isio navilikuvwagha uvutwa vwa Nguluve. ²² neke ulughano lwa Mhepo lwe lughano. kuho-voka, ulutengano ulugudo, ²³ uvukoola uvumuunu uvunofu, ulwitiko, uvukoola, nu vudebe, kusila ndaghilo mu ndavule isio. ²⁴ vala vano va Kilisite Yesu vaghupumwisie um'bili palikimo ni noghelua saae imbivi. ²⁵ ndeve tukukala kwa Mhepo, kange tughendaghe kwa Mhepo. ²⁶ natungavisaghe na kukughinia, natungahovesanaghe nambe kuvonelanila kitule.

uvwandulilo vwa 6

¹ nyalukolo ndeve umuunhu ghweni akolilue mu vuhosi, umue mwe va Mhepo, lunoghile kukun'gomosia unyalukolo ujoo ku numbula ija vukola. kuno mukujilolela jumue kuuti namungaghesivuaghe. ² mutolelanilanaghe amasigho, mu uluo mukujikamilisia indaghilo ja Kilisite. ³ ndeve umuunhu ghweni ukughinia kuuti umwene ghw nono kukila himbe na kiinu, ikujisyaanga jujoo. ⁴ amuunhu ghweni na akagule imbombo jake, pepano iva ni kiinu kyake mwene ikya kukughinia, kisila kukulingania umwene

nu junge. ⁵ ulwakuva umuunhu ghweni litola un'sigho ghwake jujuo. ⁶ umuunhu juno avulani-sivue ilisio lunoghile kuhanga amanono ghoni nu m'bulanisi ghake. ⁷ namungasyanguaghe. uNguluve naihighua, kino avyalile jumonga kye ilitavula. ⁸ juno ivyala imbeju jake mu sambi ilitavula uvunangifu, looli juno ivyala imbeju mwa Mhepo ilitavula uvwumi vwa kusila na kusila kuhuma kwa Mhepo. ⁹ natungakatalaghe kuvomba sino sinoghiile ulwakuva mu nsiki ghwake tulipeta ndeve natilidenyeka inumbula. ¹⁰ pe lino unsiki ghuno tuuva ni nafasi umuunhu ghweni atendaghe sino sinoghile. looli vano vali mu n'kate ja lwitiko. ¹¹ lola uvukome vwa kalata sino nikavalembile ku luvoko lwango june. ¹² vala vano vinoghua kuvomba inono isa m'bili vevene vikuvalasimisia kukekua. vivomba ndikio kuuti navangingilaghe mu mhumhuko sa kikovekano kya Kilisite. ¹³ ulwakuva vope avuo vano vakekilue avene navivomba inaghilo. pe pano vilonda umue mukekue neke viise kukughinia amavili ghinu. ¹⁴ nalungahumilaghe kukughinia kisila kikovekano kya Mutwa ghwitu uYesu Kilisite. mwa mwene iisi jikapumusivue kulyune, nu mwene mu iisi. ¹⁵ ulwakuva tukakekilue nambe kisila kukekua kuuva kye kiinu. pe pano uluholuo ulupia lwe lung-hanike. ¹⁶ ku vooni vano vikukala muvutavike uvu, vavisaghe nu lughano ni kisa fivisaghe lu vooni, na ku Isilaeli ja Nguluve. ¹⁷ kuhuma lino umuunhu ghweni nangamhumhusiaghe, lwakuva nipindile ilitavua Iya Yesu mu m'bili ghwango. ¹⁸ uvumosi vwa Mutwa ghwitu uYesu

Vagalatia uvwandulilo vwa 6:18 xiv Vagalatia uvwandulilo vwa 6:18

Kilisite vuve mu numbula sinu vanyalukola
vango. Ameni

Vwanji Bible **The New Testament in the Vwanji language of** **Tanzania**

copyright © 2020 Door43 World Mission Community

Language: Kivwanji (Vwanji)

Translation by: Door43 World Mission Community

Contributor: Cloud Roman, ITTO, Mwj. Lucas Ndugu, Tiralaleli Ndugu, Julieth Ngogo, Vwanjimt

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2020-11-10

PDF generated using Haiola and XeLaTeX on 22 Feb 2024 from source files dated 31 Aug 2023

0fe8b31a-d7bb-5580-ae6c-d8de2d786d46